

Script of Evening Gojri News Bulletin 12 December 2024 at 1700 Hrs

ایوننگ گو جری نیوز بلیٹن مو 12 دسمبر 2024

یوہ آکا شوانی جموں ہے محبوب سلطانی تے عبدالرحمان شاہین تیں خبر سُنو۔ پہلاں خاص خاص خبر۔

- *1. وزیر اعظم نریندر مو دی نے دیہی خواتین نانہہ باختیار بنان ور جل جیون مشن غی تعریف کی ہے۔
- *2. قومی تحقیقاتی ایجنسی نے ریا سی مانہہ دہشت گرداں نانہہ مالی مدد کرن مانہہ شامل نیٹ ورک غے خلاف چھاپہ ماری کی تے حفاظتی دستاں نے ریا سی ضلع مانہہ دہشت گرداں غی کمین گاہ نانہہ تباہ کر غے خاصی تعداد مانہہ گولی سکو برآمد کیو ہے۔
- *3. ضلع پونچھ مانہہ لائن آف کنٹرول غے نیڑے اک پاکستانی درانداز نانہہ گرفتار کیو گیو ہے۔
- *4. مرکزی وزیر نتن گڈکری نے کہیو ہے جے حادثہ توں متاثر افراد واسطے بغیر پیسہ غے علاج غی اسکیم جلد شروع کی جائے گی۔
- *5. تے جموں کشمیر مانہہ محکمہ موسمیات نے 18 دسمبر تک موسم خشک رہن غی پیشنگوئی کی ہے۔ اُنگان تازہ برفباری توں بعد مغل سڑک نانہہ گڈیاں غی آؤ جائی واسطے بند کر دتو گیو ہے۔

خبراں غی تفصیل نال پہلاں باغ عبید الرحمان۔

PM JJM

وزیر اعظم نریندر مو دی نے اج جل جیون مشن غی تعریف کرتاں واں کہیو ہے جے اس سکیم نے خواتین نانہہ بالخصوص دیہی علاقہ مانہہ باختیار بنان مانہہ اہم رول ادا کیو ہے۔ اک سماجی ذرائع ابلاغ پوسٹ مانہہ وزیر اعظم نے کہیو ہے اُن غا بوہاں ور صاف پانی پُجن توں بعد ہن وے ہنر ترقیات تے خود انحصار بنن ور توجہ مرکوز کر سکیں۔

NIA Raids JK

دہشت گردانہ سرگرمیاں مانہہ مدد فراہم کرن آلاں تے ایسا ہی بنیا دی سطح ور کا رکنان غا نیٹ ورک نانہہ ختم کرن غا مقصد سنگ قومی تحقیقاتی ایجنسی این آئی اے نے اج ریا سی ضلع غا مہور علاقہ مانہہ چھاپہ ماریا۔ اس آپریشن غو مقصد خطہ مانہہ دہشت گردی غی حمایت آلا نظام نانہہ ختم کرنو ہے۔ واضع رہ جے حالیہ دناں مانہہ این آئی اے نے جموں خطہ مانہہ اپنی کا روائیں تیز کر دتی ہیں، تے اُن افراد نانہہ نشانو بنایو جا رہیو ہے، جن ور دہشت گردانہ سرگرمیاں مانہہ مدد دین غو شُبہ ہے۔ اس تیں پہلاں 21 نومبر 2024 نانہہ این آئی اے نے جموں غا 5 ضلعان مانہہ 8 مقامات ور اے طرح غا چھاپہ ماریا، جہیڑا کہ بنیا دی طور سرگرم کا رکنان ور مرکوز تھا۔ جن ور مبینہ طور دہشت گردانہ دراندازی غی کوششاں مانہہ مدد فراہم کروان غو الزام تھو۔

Reasi Hideout

دہشت گردی غے خلاف جنگ اور خطہ مانہ امن برقرار رکھن بارے جاری کوشش مانہ اک بڑی کامیابی غے تحت حفاظتی دستاں نے اک سانجھا آپریشن غے دوران کل شام نانہ ریاسی ضلع مانہ دہشت گرداں غی اک چھین آلی جگہ نانہ تباہ کیو ہے۔ آکاشوانی جموں غا نامہ نگار غے مطابق قابل اعتماد خفیہ اطلاع ور مبنی اک تلاشی آپریشن ریاسی ضلع غی مہور تحصیل غا لپری علاقہ مانہ حفاظتی دستاں نے انجام دتو۔ جس غا نتیجہ مانہ دہشت گرداں غا چھین غا اک ٹھکانہ غو پتو چلیو۔ حفاظتی دستاں نے اس کاروائی مانہ ہتھیاراں اور گولی بارود گو بڑو ذخیرو برآمد کیو۔ جس مانہ شامل ہیں اک اے کے 47 رائفل، 3 اے کے 47 میگزین، 2 پستول میگزین سمیت 5 سو 11 اے کے 47 غی گولیں، 14 پستول غی گولیں، 4 ہتھ گولہ تے اک بیگ، ضبط شدہ سامان نانہ محفوظ کرلیو گیو ہے۔ اور مزید تحقیقات جاری ہے تانجے برآمد کیا گیا ہتھیاراں غا ماخذ غو پتو لایو جاسکے۔ اور دہشت گرد سرگرمیاں سنگ کسے ممکنہ تعلق نانہ دریافت کیو جاسکے۔

LoC poonch

بھارتی فوج نے پچھلے تہارے ضلع پونچھ مانہ کنٹرول لائن غے نیڑے دراندازی غی اک کوشش نانہ ناکام بنا دتو ہے۔ مہارا آکاشوانی جموں غا نامہ نگار نے خبر توری ہے جے پاکستانی دراندازی جس غی پشان محمد صادق عمر 18 بہراں غے طور کی گئی ہے، سرحد غے اُس پار توں اس پاسے داخل ہون غی کوشش کر رہیو تھو، جس نانہ سرحدی تار بندی غے نیڑے نور کوٹ گراں مانہ موجود چوکس فوجی جواناں نے کل شام نانہ روک دتو۔ اس ضمن مانہ پوچھ تاچھ جاری ہے تانجے دراندازی کرن غا مقصد بارے پتو لایو جاسکے۔ ابتدائی پوچھ تاچھ توں بعد یوہ اندازو لایو جاسکے جے یوہ درانداز غلطی نال قبضہ لکیر غے اس پاسے آيو ہے۔ تاہم درانداز کولوں کوئی وی مجرمانہ مواد برآمد نہیں کیو گیو ہے۔

RS Adjourned

راجیہ سبھا مانہ اج حزب اختلاف غی طرفوں آڈانی گروپ ور رشوت خوری غا الزام تے امریکہ مانہ مقیم جارج سوروس فاؤنڈیشن غو کا نگرسی رہنماواں سنگ تعلق بارے حکومت تے حزب اختلاف بشکار زبانی تقرار توں بعد اج غی کاروائی نانہ ملتوی کر دتو گیو ہے۔ پہلاں ملتوی کرن توں بعد جد ایوان دوپہر 2 بجے دوبارہ بیٹھو تاں دوہاں طرفوں حکومتی تے حزب اختلاف غا ممبراں غی طرفوں نعرہ بازی شروع ہو گئی۔ اس ضمن مانہ چیرمین جگدیپ دھنکڑ نے شور و گُل غے دوران بی ایوان غی کاروائی چلان غی کوشش کی۔ جے ڈی ایس غا ممبر ایچ ڈی دیو گوڑا نے چیرمین غے خلاف عدم اعتماد غی تحریک غو نوٹس دین ور حزب اختلاف غی تنقید کی۔ حزب اختلاف غا لیڈر ملک ارجن کھڑگے نے جناب دھنکڑ ور جانبدار ہون غو الزام لایو۔ ملک ارجن کھڑگے غی تقریر غے دوران دوہاں طرفوں ممبراں نے احتجاج تے نعرہ بازی جاری رکھیو۔ بی جے پی گا صدر تے وزیر صحت جے پی نڈہ نے حزب اختلاف نانہ چیرمین غی شبیہ خراب کرن غی کوشش ور مزمت کی۔ جناب جے پی نڈا نے لوک سبھا مانہ حزب اختلاف غا رہنما راہل گاندھی نانہ نائب صدر گا عہدہ غو احترام نہ کرن ور تنقید غو نشانو بنایو۔ اس ہنگامہ خیزی غے بشکار چیرمین نے ایوان غی کاروائی نانہ دن پھر واسطے ملتوی کر دتو۔

SIH IIT Jammu

سمارٹ انڈیا ہیکتھان 2024 سافٹ وئر شمارو اج آئی آئی ٹی جموں مانہہ اختتام پزیر ہو جا ئے گو۔ جت نوجوان جدت کاراں نانہہ حقیقی دُنیا غا مسائل سنگ نمڑن با رے اکھٹاں کیو گیو ہے۔ یوہ 36 گھنٹاں گو مسلسل ہیکتھان اج اختتام پزیر وے گو۔ جت مُلک پھر تیں 28 ٹیم اک دوجی غے خلاف مقابلو کر رہی ہیں۔ یاہ بڑی تقریب بعنوان ”سُجن کی شکتی نووا چار کا آدھار“ یعنی تخلیق غی طاقت جدت غی بنیاد غے تحت شروع ہوؤ۔ یوہ پروگرام سائبر سکیورٹی ذراعت، صحت عامہ، سمارٹ شہراں تے پائیداری جیسا شعباں مانہہ نوجواناں غی قیادت مانہہ جدت نانہہ فروغ دے۔ معزز شخصیات بشمول آئی آئی ٹی جموں غا ڈائریکٹر پروفیسر منوج سنگھ گور نے تقریب مانہہ شرکت کرن آلاں نانہہ مسائل غا حل واسطے آے آئی یعنی مصنوعی ذہانت تے چیزاں با رے انٹریٹ یعنی آئی او ٹی جیسی ٹیکنالوجیز استعمال کرن غی ترغیب دتیں۔

LG Tributes

لیفٹنٹ گورنر منوج سنہا نے نامور فوجی کمانڈر جنرل زور آور سنگھ نانہہ اُن غی شہادت غے روز خراج عقیدت پیش کیو ہے۔ لیفٹنٹ گورنر نے کہیو ہے جے وے بہادر ترین تے سب تیں زیادہ متاثر کُن جنگجواں وچوں اک تھا، تے اُنہاں نانہہ ہمیشہ اُن غی حکمت عملی غی ذہانت اور مادرِ وطن واسطے اُن غی بے لوث محبت غی وجہ تیں یا دکیو جا ئے گو۔ لیفٹنٹ گورنر بوراں نے کہیو جے اُن غا نظریہ دور اندیشی تے اقدار ہم نانہہ معاشرہ غا اُن طبقات واسطے کود نانہہ دوبارہ وقف کرن غی رہنمائی کریں، جنہاں نانہہ پچھے چھوڑ دتو گیو ہے۔

یہ خبر تم آکاشوانی جموں تیں سُن رہیا ہیں خبراں غا باقی حصہ نال محبوب سلطانی۔

Nitin Gadkari Accidents

سڑک ٹرانسپورٹ تے شاہراں غا مرکزی وزیر نتن گڈکری نے اج لوک سیہا مانہہ وقفہ سوالات غے دوران اک سوال غا جواب مانہہ کہیو ہے جے حادثاں توں متاثر ہون آلا افراد واسطے بغیر پیسہ غا علاج با رے سکیم پورا مُلک مانہہ جلد شروع کی جائے گی۔ وزیر موصوف نے کہیو جے 6 ریاستاں مانہہ اس سکیم نانہہ شروع کیو گیو ہے جد کہ باقی ریاستاں مانہہ وی جلد شروع کیو جا ئے گو۔ اس سکیم سنگ حادثہ توں متاثر شخص ہسپتال مانہہ 1 لکھ 50 ہزار تک بغیر پیسہ غے علاج کروا سکے گو۔ شاہراں ور بدھتا حادثاں ور تشویش غواظہار کرتاں واں وزیر موصوف نے ممبراں نانہہ ہر اک ضلع مانہہ حادثاں غی روک تھام با رے کمیٹی بنان با رے وی کہیو، تانجے اِن بدھتا حادثاں پچھے وجہ غو پتو لایو جا سکے۔ جناب گڈکری نے کہیو جے اس سکیم سنگ جنہاں 6 ریاستاں مانہہ اس غو نفاذ عمل مانہہ آئیو گیو 2 ہزار 1 سو جاناں نانہہ ہون توڑی بچاؤ گیو ہے۔

Job Fear Reasi

جموں کشمیر محکمہ روزگار نے ریاسی غا ضلع روزگار تے رہنمائی با رے مرکز مانہہ مقامی نوجواناں نانہہ روزگار غا موقعہ مہیا کران واسطے اک بڑو روزگار میلو منعقد کیو۔ اس دوران بکھ بکھ شعباں بشمول صحت دیکھ بہال، تعلیم، مہمان نوازی تے سکیورٹی شامل ہیں مانہہ 5 سو 30 توں متا روزگار موقعہ دتا گیا۔ اس تقریب غے دوران موقعہ

سر انٹرویو غے نال نال کریر کو نسلینگ تے روزگار غی تلاش مانہہ نوجوانان مانہہ رہنمائی وی دتی گئی۔ نال ہی نال امید واراں مانہہ آن لائن پلیٹ فارم جن مانہہ

www.jakemp.nic.in / www.ncs.gov.in

شامل ور اندراج بارے وی ترغیب دتی گئی، تاجے وے مزید روزگار غا موقعہ بارے جانکا ری حاصل کر سکیں۔ اس سلسلہ مانہہ مہارا ضلع غا نمائندہ دیندر ٹھاکر سنگ گل کرتاں وان ضلع روزگار تے کونسلینگ مرکز غی اسسٹنٹ ڈائریکٹر انی وید نے اس طرح کہیو۔۔ بائٹ۔۔

Army Poonch

بھارتی فوج نے پچھلے تہارے ضلع پونچھ غا دور دراز علاقہ اُپر سیندرہ مانہہ سماج غا پسماندہ طبقاں واسطے اک مفت صحت دیکھ بھال کیمپ منعقد کر غے ات رہ رہیا لوکاں مانہہ دوائی تقسیم کیں۔ اس کیمپ غو انعقاد دور دراز علاقہ مانہہ رہ رہیا گجر بکروال لوکاں واسطے کیو گیو تھو، جہیڑا بہتر طبی دیکھ بھال توں محروم ہیں۔ اس دوران تربیت یا فٹہ ڈاکٹراں غی نگرانی مانہہ صحت دیکھ بھال خدمات، عام بیماریاں غی دوائیاں غے نال نال موسمی بیماریاں غی دوائیاں وی لوکاں مانہہ مہیا کروائی گئیں۔ ات غا لوکاں غا اعلاج غے نال نال انہاں مانہہ سرکاری صحت سکیمیاں توں فائدو حاصل کرن بارے تیار کیو گیو۔

Weather Jk

محکمہ موسمیات نے 18 دسمبر تک جموں کشمیر مانہہ موسم خشک رہن غی پیشنگوئی کی ہے۔ تے اس ضمن مانہہ پچھلی رات کہٹ و کہٹ درجہ حرارت 5 عشاریہ 4 ڈگری سلیسس جد کہ پچھلے تہارے متاتوں متو درجہ حرارت 19 عشاریہ 9 ڈگری سلیسس ریکارڈ کیو گیو ہے۔ تاریخی مغل سڑک جہیڑی جموں ڈویژن غا 2 ضلع بشمول راجو ری تے پونچھ مانہہ کشمیر صوبہ غا شوپیاں ضلع سنگ جوڑے مانہہ تازہ برفباری توں بعد گڈیاں غی آؤ جائی واسطے بند کر دتو گیو ہے۔ اس سلسلہ مانہہ ڈی ایس پی ٹریفک پونچھ شیو کمار نے دسیو ہے جے سڑک توں برف ہٹان غا عمل مانہہ پورو کرن تیں بعد سڑک ور گڈیاں غی آؤ جائی مانہہ بحال کر دتو جائے گو۔

Khelo India

کھیلو انڈیا سردیاں آلی کھیڈ 2025 لداخ تے جموں کشمیر مانہہ 2 بکھ بکھ مرحلاں مانہہ منعقد وین گی۔ لداخ آئیس باکی تے آئیس سکا ٹینگ سکینگ سمیت برفیلی کھیڈاں غی میزبانی کرے گو، جہیڑی 23 جنوری تیں 27 جنوری تک منعقد وین گی۔ جد کہ جموں کشمیر 22 فروری تیں 25 فروری تک الیائین اسکیٹینگ، سکائی مو نٹینگ تے سنبو روڈینگ جیسی برفانی کھیڈاں غی میزبانی کرے گی۔ کھیڈاں غا مرکزی وزیر ڈاکٹر منسکھ مانڈویا نے آن آلی کھیڈاں بارے خوشی غو اظہار کیو ہے تے اُن غی اہمیت مانہہ 2026 سرمائی المپکس واسطے کھڈاریاں غی شناخت مانہہ آجاگر کیو۔ انہاں نے کہیو جے مہارو مقصد سردیاں آلی کھیڈاں مانہہ فروغ دینو، اور مزید کھلاڑیاں مانہہ اسکیٹینگ تے ان جیسی کھیڈاں مانہہ شامل ہون غی ترغیب دینو ہے۔ یوہ لگاتار دو جو سال وے غو جد لداخ کھیلو انڈیا سرمائی کھیڈاں غا کُجھ حصہ غی میزبانی کرے گو۔ 2024 غا شمارہ توں پہلاں جموں کشمیر نے ساری کھیڈاں غی میزبانی کی تھی۔

اس غے نال ہی خبراں غو یوہ بلیٹن ختم ہوؤ۔